

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होर अज्ज नमीं दिल्ली च वेनेजुएला दिएं कार्यवाहक राष्ट्रपति डेल्सी रोड्रिग्स हुंदे नै मलाटी करडन। ऊर्जा/सुरक्षा/बपार/ सेहत/ ट्रांसपोर्ट सनें केई क्षेत्रें च सहयोग बधाने पर चर्चा दी मेद।
2. गृहमंत्री अमित शाह होर अज्ज शिलांग च पूर्वोत्तर परिषद दे 73में पूर्ण सत्र दी अध्यक्षता करगंन।
3. अमरीका दे विदेशमंत्री मार्को रुबियो होरें आखेआ ऐ कि भारत ते अमरीका मते चिरे थमां बलगे जा'रदे इक महत्वपूर्ण बपार समझौते गी खीरी शकल देने शा किश गै हफते दूर न।
4. मौसम विभाग नै अज्ज केरल ते माहे लेई भारी बरखा दा ऑरेंज अलर्ट जारी कीता ऐ- मुखे दे ज्यादातर हिस्सें च बरखा/ अंझी-झकखड़ ते ऐन-गड़ा पौने दे आसार।
5. पैहली विश्व योगासन खेड्ठ प्रतियोगिता अज्जै थमां अहमदाबाद च शुरु होआ रदी ऐ- प्रधानमंत्री मोदी सजा'लै वीडियो कांफ्रेसिंग राए एहदे च शामिल होगंन।
6. ते भारत नै भूटान गी रहाइयै सैफ महिला फुटबाल चैम्पियनशिप दे फाइनल च प्रवेश करी लैता ऐ।

<><><><><><>

ते हून खबरा विस्तार कन्नै:-

PM- Venezuela Prez Talks

प्रधानमंत्री नरेन्द्र मोदी अज्ज नमीं दिल्ली च वेनेजुएला दिं कार्यवाहक राष्ट्रपति डेल्सी रोड्रिग्स हुंदे'नै गल्लबात करडन। दौने नेताएं बश्कार ऊर्जा- सुरक्षा- बपार ते निवेश- औषधि- सेहत सेवा- ट्रांसपोर्ट ते अक्षय ऊर्जा सनें बक्ख-बक्ख खेतरें च सैहयोग बधाने पर चर्चा होग। राष्ट्रपति डेल्सी रोड्रिग्स कल भारत दी 5एं दिनें दी जातरा पर नमीं दिल्ली पुज्जियां। उन्दे कन्ने इक उच्ची सतह दा डेलीगेशन बी ऐ। वेनेजुएला दा एह डेलीगेशन भारत दे ऊर्जा/ औषधि ते Automobile खेतरें कन्ने जुड़े दे केई इदारें दा दौरा करोग। एहदा मकसद भारत दे तकनीकी ते औद्योगिक समर्थ गी समझना ते सैहयोग दिं नमीं संभावनाएं दी तलाश करना ऐ।



HM-NEC

केन्द्री गृह मंत्री अमित शाह होर अज्ज मेघालय दी राजधानी शिलांग च पूर्वोत्तर परिषद दे 73में पूर्ण सत्र दी बैठक दी अध्यक्षता करगंन- जेहदे च परिषद दे उपाध्यक्ष ज्योतिरादित्य एम. सिधिया ते राज्यमंत्री डाक्टर सुकांता मजूमदार होर बी शामिल होगंन। इस बैठका च पूर्वोत्तर दे सब्भनें 8 राज्यें दे राज्यपाल ते मुखमंत्री बी हिस्सा लैगंन- जिनें प्रमुख मुद्दे पर इस बैठका च चर्चा होनी ऐ उन्दे च सैलसफा- राई बाई- बागवानी ते इस खिते च रासपूजी गी बढ़ावा देना शामिल ऐ। एहदे कन्नो-कन्नी दुध- अंडे- मच्छी ते मास उत्पादन दे क्षेत्र च पूर्वोत्तर गी आत्मनिर्भर बनाने बारे प्रमुखता कन्ने सोच-विचार कीता जाहग। बैठक च क्षेत्रीय विकास लेई खडेरी गेदी मुख मंत्रिं

दी उच्ची सतह दे कार्जबल आसेआ कीती गेदी प्रगति दी समीक्षा बी एहदे च कीती जा'रदी ऐ।



Macro Rubio –US India

अमरीका दे विदेश मंत्री मार्को रुबियो होरें आखेआ ऐ कि भारत ते अमरीका मते चिरे थमां बलगे जा'रदे इक महत्वपूर्ण बपार समझौते गी खीरी रुप देने शा किश गै हफते दे छिंडे पर न। एह गल्ल उ'नें जंदी रातीं अमरीका दी विदेशी मामले सरबंधी संसदीय कमेटी दी सुनवाई दौरान आकखी। मार्को रुबियो होरें अपनी हालिया भारत यात्रा ते विदेशमंत्री डाक्टर एस. जयशंकर हुंदे कन्नै होई दिएं व्यापक मलाटिं दा हवाला दिंदे होई आखेआ कि दवै मुख्य इस समझौते गी मुकदा रुप देने दे मते कोल-कच्छ पुज्जी गेदे न। रुबियो होरें आखेआ कि एह समझौता दौने मुख्यें लेई मता फैयदेमंद ते टिकाऊ साबत होने आहला ऐ।



UK Foreign Min.

ब्रिटेन दी बिदेश ते राष्ट्रमंडल मामलें दी मंत्री यवेट कूपर द'ऊ दिनें दी सरकारी जातरा पर कल रातीं नमीं दिल्ली पुज्जियां। ओह अज्ज प्रधानमंत्री नरेन्द्र मोदी हुंदे'नै मलाटी करडन। ओह अज्ज संजा बदेश मंत्री डाक्टर एस. जयशंकर हुंदे'नै बी मलाटी करडन। बदेश मंत्रालय नै आखेआ ऐ जे उन्दी एह जातरा भारत ते ब्रिटेन दी व्यापक रणनीतिक सांझ-भ्याली गी होर मज़बूत करने दा मौका प्रदान करोग।



Varanasi -BRICS

प्रधानमंत्री नरेन्द्र मोदी हुंदा संसदीय हलका इक बारी परतियै इक बड्डे आयोजन दी मेजबानी लेई त्यार ऐ- जिते अज्ज ते कल ब्रिक्स मुखें दे सांस्कृतिक ते कार्जसमूह दी दुई बैठक लग्गने जा'रदी ऐ। बैठका च ब्राजील- चीन-रुस संयुक्त अरब अमिरात- ईरान ते दक्खन अफ्रीका सनें ब्रिक्स मुखें दे प्रतिनिधि हिस्सा लै करदे न। इस बैठक दा मुख मकसद मिम्बर मुखें च सांस्कृतिक विरासत दा संरक्षण- टिकाऊ विकास- रचनात्मक अर्थ-बवस्था ते आर्टिफीशल इंटेलीजेंस दे असर बारे सोच-विचार करना ऐ। एहदे शा पैहले वाराणसी च जी-20 दियां बैठकां बी लग्गी चुकी दियां न। सम्मेलन दौरान शैहरा च इक प्रदर्शनी बी लोआई जा'रदी ऐ- जेहदे च दुनिया भरै च मशहूर जी.आई टैग आहलियां ते “इक जिला- इक उत्पाद”- तैहत दर्ज कलाकृतियें ते उत्पादें दा प्रदर्शन बी कीता जाहग।



Weather

मौसम विभाग नै अज्ज केरल ते माहे लेई लगातार भारी बरखा दे आसार दस्सदे होई ऑरेंज अलर्ट जारी कीता ऐ ते अज्ज 12 कोला 20 सेंटीमीटर धोड़ी बरखा दर्ज कीती जाई सकदी ऐ। एहदे इलावा अंदमान निकोबार- अरुणाचल प्रदेश- असम- मेघालय- कर्नाटक- कोकण- गोवा- लक्षद्वीप- उपहिमाली- पच्छिम बंगाल- सिक्कम- तमिलनाडू- पुदुचेरी ते उत्तराखंड च बी अज्ज भारी बरखा दी पेशनगोई कीती गेदी ऐ। एहदे इलावा मौसम विभाग नै पूर्वी राजस्थान- हिमाचल प्रदेश- जम्मू कश्मीर- लद्दाख- मध्य प्रदेश ते उत्तराखंड च बी अज्ज गड़की-लिश्कियै बरने ते किश थाहरें ऐन-गड़ा पौने दी बी मेद

दस्सी दी ऐ। एहदे इलावा दिल्ली- हरियाणा- चंडीगढ़- पंजाब- राजस्थान- तेलंगाना ते विदर्भ च बिजली कड़कने ते बरखा दे आसार दस्से गेदे न- जिसले कि पच्छमी राजस्थान च अज्ज धूड़- भरोचा अंधी-झक्खड़ आई सकदा ऐ।



PM –Yogi

पैहली विश्व योगासन खेड्ड प्रतियोगिता अज्जै थमां गुजरात दे अहमदाबाद च शुरु होआ करदी ऐ। 5एं दिनें दे इस आयोजन च अमरीका- जापान- नीदरलैंड- ओमान- मॉरीशस- युगांडा- जाम्बिया- श्रीलंका- नेपाल ते केन्या सनें 70 शा मते देशें दे 500 शा बद्ध एथलीट हिस्सा लैंडन। एहदे च बक्ख-बक्ख आयु-वर्गे लेई पारम्परिक योगासन- कलात्मक योगासन ते लयबद्ध जोड़े सनें केई विधां शामिल होगंन। प्रतियोगिता च सब जूनियर- जूनियर ते सीनियर वर्गे दे मर्द ते महिलां एथलीटें लेई केई चाल्ली दिआं प्रतियोगितां होडन। भारत च इस खेड्ड लेई राश्ट्री महासंघ- योगासन भारत- विश्व योगासन ते भारती ओलम्पिक संघ दे सैहयोग कन्नै इस प्रतियोगिता दा आयोजन करा'रदा ऐ। प्रधानमंत्री नरेन्द्र मोदी अज्ज संजा तकरीबन 6 बज्जियै 40एं मिन्टें पर वीडियो कांफ्रेंस दे राहें इस कार्यक्रम च शामिल होडन।



Delhi –Fire Incident

दिल्ली दे मालवीय नगर इलाके च इक होटल च कल पेश आई दी अग्ग लग्गने दी घटना च मरोने आहलें दी गिनतरी 21 होई गई ऐ- जिंदे च 12 विदेशी नागरिक शामिल न। पुलसै जानकारी दिती ऐ कि 49 घायलें गी दिल्ली दे बक्ख-बक्ख अस्पतालें

च दाखल कराया गेदा ऐ। पुलसै इस घटना दे बारे च मामला दर्ज करियै अग्गे दी जांच प्रक्रिया शुरु करी दिती दी ऐ। पुलसै मुजब होटल दे मालक लवकेश बजाज गी हिरासतै च लेई लैता गेदा ऐ। जानकारी मुजब मारे गेदे विदेशी नागरिकें चा ज्यादातर इलाज कराने लेई मेडिकल वीजें पर आए दे हे। प्रधानमंत्री नरेन्द्र मोदी हारे इस हादसे पर गैहरा दुख प्रगट कीता ऐ। सरकार आसेया मारे गेदे लोकें दे परोआर आहलें लेई 2-2 लक्ख रपे ते घायलें लेई 50-50 जहार रपे दे मुआवजे दी घोषणा कीती गई ऐ। अग्ग लग्गने दे सेही कारणें दी जांच कीती जा'रदी ऐ। दिल्ली दिएं मुखमंत्री रेखा गुप्ता हारें आखेआ ऐ कि इस होटल दी जांच कीती जा'रदी ऐ ते कसूरवारें गी बखशेया नेंई जाहग।



SAFF -Football Women

भारत नै भूटान गी रहाइयै सैफ महिला फुटबाल चैम्पियनशिप दे फाइनल च प्रवेश करी लैता ऐ। गोवा दे मारगाओ च खेड्ढे गेदे इस दिलचस्प मकाबले च भारतीय महिला फुलबाल टीम- ब्लू टाइग्रेसिस नै भूटान गी 1-0 कन्नै रहाई दिता। इस जित दे कन्नै गै 5 बारी दी चैम्पियन भारती टीम नै 6 बरे च पैहली बारी टूर्नामेंट दे फाइनल च पुज्जने च कामयाबी हासल कीती ऐ। हून फाइनल मकाबले च भारत दा सामना मजूदा चैम्पियन बंगलादेश कन्नै होग जिन्नै जंदे रोज दुए सैमीफाइनल च नेपाल गी 2-1 कन्नै रहाइयै फाइनल च अपनी थाहर पक्की कीती। फाइनल मकाबला शनिवारे संजा साइडे 6 बजे खेड्ढेया जाहग।

